



25. april 2024

## **Ullormut oqaluuserisassani ikaarsaariarnermi tulliuuttumut Siunnersuut Inatsisartut Suliariaasiat § 52 malillugu**

Demokraatiniit Atassummiillu Aningaasaqarnermut Akileraartarnermullu Naalakkersuisoq atuuffimmini sulisinnaanera tatigiunnaarparput.

Naalakkersuisoq eqqaaneqartoq piffissami sivitsortumi aaliangiisarnermigut tatiginassutsimigut ernumanaatilimmik saqqummertarsimavoq, arlaleriartumillu paasissutissanik eqqunngitsunik inuiaqatigiinnut anngussisarsimalluni. Tamanna akuersaaginnarneqarsinnaajunnaarpoq.

Nunarput nukittuumik Aningaasaqarnermut Akileraartarnermullu Naalakkersuisoqartariaqarpoq, suliassani ernumanaateqarani ingerlatsisinnaasumik.

Aningaasaqarnermut Akileraartarnermullu Naalakkersuisoq Akileraartarnikkut akitsuusersuinikkullu aaqqissusseqqinnermi IA Siumullu kisiartaallutik peqataaffiginerannut suliamik pitsaangitsumut akisussaanerpaalluni ingerlatsisimavoq. Aaqqissusseqqinnertut taanna taaneqarsimasoq suli aningaasalersorneqanngilaq, taamatuttaarlu innuttaasunut aammalu inatsisartunut nassuiaasimanera amigartorujussuulluni. Suliniutit qaqugu atuutilissanrsut aammalu qanorpiaq ingerlanneqassanersut tamanit iluamik ilisimaneqanngillat.

Taassuma avataasigut Naalakkersuisoq eqqaaneqartup suut aaliangersarsimanerlugit ilisimasannginneri ernumanaateqarpoq. Tamanna sukkunut akitsuutit peerneqarnerini takuarput, Aningaasaqarnermut Akileraartarnermullu Naalakkersuisoq aaliangerneqarsimasut ima kukkutigimmagit allaat naalakkersuisooqatigiinni inatsisartunut ilaasortaasut sorlerpiaat akikinnerulersimanersut ilisimasimanagit.

Kingullertigut Naalakkersuisoq eqqaaneqartoq illutungiliuttuniit siunnersuutigineqarsimasoq allanngortinnagu assinganik saqqummiussipallattoq takuarput innuttaasunullu erfalasmaarutiginarlugu saqqummertoq. Tamanna Naalakkersuisutut naleqassusermut tulluutinngilaq.

Naggataatigullu Aningaasaqarnermut Akileraartarnermullu Naalakkersuisoq maanna siunnersuutigineqartumut akitsuutinillu piaanissanut siunnersuutigineqarsimasunut isummerfiginngeriarlugit skuffimmut ilisassatut allannguutissatut siunnersuuteqaqattaarnera tatiginassutsiminut innarliitigiinnarpaa.

Taakku tunngavilersuutigalugit Demokraatiniit Atassummiillu oqariartuutigaarput Aningaasaqarnermut Akileraartarnermullu Naalakkersuisoq tatigiunnaaratsigu, taamaattumillu ullormut oqaluuserisassani ikaarsaariarnermut tulliuuttumut Naalakkersuisoq eqqaaneqartoq peqquteqartumik tatiginikkunnaarnermik takutitsissalluta siunnersuutigaarput.